

Surat Kiriman Tidak Rasmi

Kamu menerima sepucuk surat daripada sahabat pena kamu dari luar negara yang meminta kamu menceritakan tempat –tempat menarik di Malaysia.

Balas surat sahabat kamu itu selengkapnya.

No. 28 , Jalan Mawar,
Taman Aman Jaya,
68000 Ampang,
Selangor.

20 Januari 2020

Menemui sahabatku, Iskandar Syah di Jakarta dengan selamatnya. Diharapkan agar saudara dan keluarga di sana dalam keadaan sihat sejahtera. Saya sekeluarga sihat-sihat sahaja.

Saudara,

Saya tertarik akan cerita saudara dalam surat yang lalu tentang tempat-tempat menarik di negara saudara. Suatu hari nanti saya pasti ke sana. Di negara saya juga banyak tempat yang sering menjadi tumpuan pelancong dalam dan luar negara.

Di Malaysia , banyak terdapat pulau yang cantik dan popular , seperti Pulau Langkawi di Kedah, Pulau Tioman di Pahang, Pulau Perhentian di Terengganu, dan Pulau Pangkor di Perak. Pulau –pulau ini menjadi tumpuan pelancong kerana pantainya putih dan bersih. Selain itu, keindahan alam semula jadi di situ masih terpelihara.

Di samping itu, Malaysia juga mempunyai tempat tinggalan sejarah. Antaranya ialah Kota A Famosa dan Perigi Hang Tuah di Melaka, Makam Mahsuri dan Lembah Bujang di Kedah, Istana Lama Seri Menanti di Negeri Sembilan , dan lain-lain. Tempat-tempat ini sentiasa dipelihara supaya generasi kami dapat mengenali sejarah negara.

Di ibu negara kami, iaitu Kuala Lumpur pula, banyak tempat menarik yang boleh dikunjungi. Antaranya ialah Menara Berkembar PETRONAS, Menara Kuala Lumpur, Pusat Sains Negara , Balai Seni Lukis , Pasar Budaya , dan lain-lain lagi. Semua tempat ini menjadi tumpuan orang ramai, terutama pada musim cuti sekolah.

Setakat ini dahulu cerita saya kali ini. Saya berharap agar saudara dapat berkunjung ke sini. Dapatlah kita sama-sama menikmati keindahan Malaysia.

Sekian , terima kasih.

Sahabatmu,
Iqmal Noor

Surat Kiriman Rasmi

Persatuan Bahasa Melayu Sekolah kamu akan mengadakan pertandingan bercerita. Sebagai setiausaha persatuan, kamu diminta menulis surat kepada guru besar untuk memohon kebenaran menggunakan dewan sekolah.

Persatuan Bahasa Melayu,
Sekolah Kebangsaan Kulai,
81000 Kulai,
Johor.

Guru Besar ,
Sekolah Kebangsaan Kulai,
81000 Kulai,

Johor.

20 April 2021

Puan,
Memohon Kebenaran untuk Menggunakan Dewan Sekolah
Dengan segala hormatnya, perkara di atas dirujuk.

2. Saya, Mohamad Iqmal bin Mohamad Noor, setiausaha Persatuan Bahasa Melayu ingin memohon kebenaran tuan untuk menggunakan dewan sekolah, Tujuan pertandingan ini adalah untuk memilih peserta bagi mewakili sekolah. Tujuan Pertandingan ini adalah untuk memilih peserta bagi mewakili sekolah ke pertandingan peringkat daerah. Butir-butir terperinci adalah seperti yang berikut :

- (a) Tarikh : 28 April 2021
- (b) Waktu : 8.00 pagi hingga 10 pagi
- (c) Jumlah murid yang terlibat : 20 Orang

3. Pertandingan ini akan disaksikan oleh semua murid tahap dua. Oleh itu, kami berpendapat bahawa dewan sekolahlah tempat yang paling sesuai untuk kami menjalankan pertandingan ini.

4. Sekiranya kami memperoleh kebenaran untuk menggunakan dewan sekolah, kami berjanji akan menjaga keselamatan dan kebersihan dewan. Selain itu, kami akan memastikan tiada sebarang kerosakan peralatan berlaku.

5. Pihak jawatankuasa persatuan berharap agar tuan dapat memberikan kebenaran sebelum 24 April 2021. Hal ini demikian supaya kami dapat melakukan persiapan dengan lancar. Kerjasama dan perhatian tuan kami dahului dengan ucapan terima kasih.

Yang benar,
Iqmal Noor
(MOHAMAD IQMAL BIN MOHAMAD NOOR)
Setiausaha,
Persatuan Bahasa Melayu,
Sekolah Kebangsaan Kulai.

Laporan

Kamu merupakan setiausaha sebuah kelab di sekolah. Kamu dikehendaki menulis laporan tentang aktiviti-aktiviti kelab tersebut sepanjang tahun ini.

Sediakan laporan tersebut selengkapnyanya.

Laporan Tahunan Kelab Komputer

Sekolah Kebangsaan Seri Wangsa.

Kelab Komputer Sekolah Kebangsaan Seri Wangsa telah ditubuhkan pada 22 Januari 2018. Sebanyak 102 orang murid menganggotai kelab ini. Pelbagai aktiviti menarik telah dijalankan oleh jawatankuasa kelab komputer sepanjang tahun ini.

Aktiviti yang dijalankan secara berterusan sepanjang tahun 2018 ialah menganjurkan kelas komputer pada setiap hari Isnin dan Rabu bagi murid-murid tahap dua. Aktiviti tersebut diadakan selama satu jam setengah di makmal komputer sekolah. Yuran dikenakan kepada setiap murid yang terlibat dan kelas diawasi oleh guru penyelarasa serta ahli kelab yang telah ditetapkan.

Pada 15 Februari 2018, aktiviti pertama telah dijalankan, iaitu sesi ceramah oleh Encik Mustakim bin Abdullah, seorang pakar dalam bidang komputer. Ceramah yang bertajuk “Kepentingan Komputer dalam Membantu Peningkatan Pengetahuan Murid-murid” itu diadakan untuk memberikan kefahaman dan kesedaran kepada murid-murid tentang kepentingan mempelajari komputer dan kaedah yang berkesan menggunakan komputer untuk mencari maklumat. Sebanyak 58 orang murid menghadiri ceramah tersebut.

Aktiviti yang lain ialah pertandingan mereka kad ucapan menggunakan komputer. Pertandingan ini telah mendapat sambutan hangat daripada murid-murid. Para pemenang pertandingan telah diumumkan dan menerima hadiah masing-masing semasa perhimpunan mingguan sekolah.

Kelab Komputer juga telah menganjurkan lawatan sambil belajar ke Universiti Multimedia pada 6 September 2018. Sebanyak 40 orang murid menyertai lawatan itu. Para peserta gembira dan berpuas hati kerana dapat menimba pengetahuan dan pengalaman baharu.

Keseluruhannya, setiap aktiviti berjaya dilaksanakan dengan lancar seperti yang dirancang. Kami berharap agar banyak aktiviti lain dapat dijalankan pada masa akan datang. Harapan kami juga agar setiap jawatankuasa dan ahli Kelab komputer terus mengekalkan semangat kerjasama yang diamalkan selama ini.

Laporan disediakan oleh,

Zainol Irfan

(ZAINOL IRFAN BIN HAMZAH)

Setiausaha,

Kelab komputer,

Sekolah Kebangsaan Seri Wangsa.

Berita

Andaikan bahawa kamu wartawan surat khabar. Tulis berita tentang kejadian banjir yang berlaku di tempat kamu.

PENGKALAN KUBUR, 28 FEBRUARI – Sebanyak 48 orang penduduk Kampung Kok Pauh dan 76 orang penduduk kampung sepatat terpaksa dipindahkan ke Sekolah Kebangsaan Kampung Kok Pauh kerana rumah mereka dinaiki air semalam . Terdahulu daripada itu, 65 orang penduduk kampung Jaya telah dipindahkan lebih awal apabila kediaman mereka dinaiki air sedalam dua meter.

Hujan lebat yang turun semalaman itu menyebabkan air naik secara mendadak. Tambahan pula, kampung-kampung tersebut terletak berhampiran dengan Sungai Golok. Operasi memindahkan kesemua mangsa banjir dilakukan oleh anggota-anggota Jabatan Pertahanan Awam.

Pihak penyelamat menggunakan beberapa buah bot untuk memindahkan semua mangsa . Polis marin turut menghantar beberapa orang anggotanya untuk memberikan bantuan . Semua mangsa diselamatkan pada malam itu juga ke pusat pemindahan mangsa banjir tersebut.

Pihak Jawatankuasa Bencana Alam Daerah Tumpat telah menyalurkan bantuan seperti makanan, pakaian, ubat-ubatan, dan keperluan lain kepada semua mangsa banjir. Menurut jurucakap jawatankuasa tersebut, sepasukan sukarelawan telah bersedia di pusat pemindahan itu untuk membantu mangsa banjir. Mereka terdiri daripada mahasiswa sebuah universiti yang berdekatan.

Tinjauan wartawan di pusat penempatan itu mendapati bahawa mangsa-mangsa banjir belum dibenarkan pulang. Hal ini demikian kerana air masih berada pada paras bahaya. Namun demikian, tiada laporan tentang kehilangan nyawa dalam kejadian tersebut hingga kini.

Catatan

Kamu mengikut keluarga kamu melancong ke suatu tempat menarik di negara kita. Tulis catatan tentang pengalaman kamu di tempat tersebut.

Sabtu, 8 September 2021

8.30 pagi

Pada hari ini, ayah membawa kami ke Tanah Tinggi Cameron. Sebaik-baik sahaja tiba di Pasar kampung Raja, saya dan adik membeli jagung rebus. Setelah berjalan-jalan selama setengah jam di situ, kami pun meneruskan perjalanan ke destinasi.

11.30 pagi

Selepas mendaftar masuk ke hotel, kamu menuju ke Ladang Teh Bharat. Kami tidak melepaskan peluang untuk mengabadikan gambar berlatarbelakangkan ladang teh yang amat indah itu. Kami sempat makan sambil minum teh tarik wangi yang istimewa di situ.

2.30 petang

Kami ke pasar Kea Farm yang menjual buah-buahan, sayur-sayuran, bunga-bunga, dan cenderamata. Ibu yang rambang mata melihat bunga-bunga di situ, akhirnya membeli bunga teluki dan kaktus. Selepas itu, kami singgah di Ladang Strawberi Raaju yang terletak bersebelahan dengan Pasar Kea Farm.

Ahad, 9 September 2021

10.30 pagi

Kami tiba di Ladang Teh BOH, pemandangan di sini amat indah dan memukau para pengunjung, termasuk kami. Setelah puas bergambar, kami duduk-duduk di pelantar ladang sambil minum teh.

12.30 tengah hari

Setelah makan tengah hari di hotel, kami pun pulang ke Taiping. Ayah memandu kereta di jalan raya yang tertinggi di Malaysia, iaitu Jalan Gunung Brinchang. Walaupun keletihan, kami sekeluarga gembira kerana banyak kenangan dan pengalaman yang kami peroleh.

Dialog / Temu Ramah / Wawancara

Rakan rumah sukan kamu telah terpilih sebagai olahragawati terbaik dalam temasya sukan tahunan sekolah yang lalu. Kamu berbual –bual dengan rakan kamu itu tentang kejayaannya.

Tulis perbualan itu selengkapnya.

Saya berbual-bual dengan rakan Rumah Oren yang baru sahaja memenangi gelaran olahragawati terbaik dalam temasya sukan tahunan sekolah kami. Yang berikut merupakan perbualan kami.

Farah : Taniah, Arrisa ! Berkat kesungguhan dan keazaman kamu, akhirnya kamu terpilih sebagai olahragawati terbaik dalam temasya sukan tahunan kali ini.

Arrisa : Terima kasih, Farah. Saya benar-benar terharu dan gembira.Saya langsung tidak menduga akan menerima anugerah itu. Maklumlah, banyak atlet lain yang berpotensi.

Farah : Bagi saya,kejayaan kamu bukanlah sesuatu yang di luar dugaan . Kamu gigih berlatih. Cikgu Sani , ketua guru Rumah Oren telah menjangkakan kejayaan kamu itu. Tambahan pula, kamu banyak menggondol pingat emas untuk pasukan kita.

Arrisa : Sebenarnya,kejayaan ini kejayaan kita semua , keluarga , guru, dan rakan-rakan Banyak memberikan sokongan kepada saya. Merekalah sumber utama kejayaan Saya.

Farah : Tetapi, kesungguhan kamu juga kunci utama kejayaan tersebut. Saya tahu bahawa kamu memang berminat dalam lapangan sukan dan mampu menjadi atlet negara dalam bidang olahraga suatu hari nanti. Semoga kejayaan ini menjadi perintis cita-cita kamu itu. Saya berdoa agar kamu berjaya menyarung jersi negara suatu hari nanti.

Arrisa : Terima kasih atas doa kamu itu. Dalam melakukan sesuatu , saya memegang prinsip. alang-alang mandi biarlah basah. Namun demikian , pada masa ini, saya harus mendahulukan bidang akademik. Saya ingin membuktikan bahawa saya mampu memperoleh 6A dalam peperiksaan UPSR meskipun kerap berada di padang untuk berlatih dan bersukan.

Farah : Mari kita ke kantin, Arrisa. Saya ingin belanja kamu hari ini bagi meraikan kejayaan Kamu itu. Bolehlah kita berbual-bual lebih panjang lagi.

Arrisa : Terima kasih . Baiklah . Kata orang, rezeki jangan ditolak.

Autobiografi

Tulis suatu karangan yang bertajuk “Aku Sebuah Kereta Kebanggaan Negara”

Namaku Perodua Bezza. Aku dilahirkan di sebuah kilang di Shah Alam, Selangor. Aku berasa bangga kerana menjadi kereta keluaran negara yang popular ketika ini. Aku bukan sahaja diminati oleh rakyat di negara ini malahan mendapat sambutan di luar negara.

Reka bentuk badanku cantik dan menarik . Aku dicat dengan warna kuning keemasan. Dalam tubuhku dilengkapi dengan pelbagai alat yang canggih dan moden. Semua fungsi pergerakanku dikawal secara automatik.

Setelah menjalani ujian kualiti dan keselamatan, aku dan rakan-rakanku telah dihantar dengan sebuah treler ke gedung kereta. Aku dipamerkan untuk dijual kepada orang ramai. Hargaku tidaklah begitu mahal untuk rakyat Malaysia memilikiku.

Banyak pengunjung yang datang ke tempat aku dipamerkan. Mereka berebut-berebut untuk membeliku. Aku akhirnya dibeli oleh seorang usahawan muda setelah dia menguji pandu diriku. Dia sangat tertarik dan berpuas hati dengan kelebihan diriku.

Dua hari kemudian, aku telah dibeli oleh tuanku lalu dibawa pulang. Aku dipandu dengan megahnya. Aku telah disambut meriah oleh isteri dan anak-anaknya. Kemudian, aku telah diletakkan di sebuah garaj untuk mengelakkan aku terkena hujan.

Aku berbangga kerana dapat berkhidmat kepada tuanku, terutama untuk pergi dan pulang dari tempat kerjanya. Aku dijaga dan dibersihkan setiap bulan. Aku disayangi oleh tuanku kerana aku tidak pernah mendatangkan masalah kepadanya.

LATIHAN PENGUKUHAN

1. Kamu berpindah sekolah kerana mengikut keluarga kamu tinggal di tempat baharu. Tulis sepucuk surat kepada seorang rakan kamu untuk menceritakan keadaan di sekolah baharu kamu itu.

2. Kamu ingin membuat aduan kepada pihak berkuasa tentang sekumpulan anjing liar di kawasan tempat tinggal kamu.

Tulis surat itu selengkapnya.

3. Sebagai pemberita di tempat kamu, kamu telah ditugaskan untuk menulis berita tentang perasmian sebuah bengkel batik di tempat kamu.

Tulis berita itu selengkapnya.

4. Kamu telah menghadiri Majlis Rumah Terbuka Aidilfitri yang dianjurkan oleh persatuan penduduk di tempat tinggal kamu.

Tulis catatan tentang majlis tersebut.

5. Pada waktu rehat, kamu telah berbual dengan seorang rakan tentang kebaikan menabung wang di bank.

Tulis perbualan tersebut selengkapnya.

6. Sebagai setiausaha sebuah unit beruniform, kamu diminta untuk menulis laporan tentang aktiviti perkhemahan yang telah diadakan pada cuti penggal persekolahan yang lalu.

Sediakan laporan itu selengkapnya.

7. Tulis karangan tentang “Aku Sebatang Pen “

Tulis karangan itu selengkapnya.